

Vuguvugu Kuu la Matengenezo

Apandaye haba atavuna haba; apandaye kwa ukarimu atavuna kwa ukarimu—
2 Wakorintho 9:6.

Pale tunapoanza kuelewa kile ambacho kafara ya Yesu ilikifanya ili kuokoa ulimwengu unaoangamia, kutaonekana mapambano makuu katika kuongoa roho. Laiti kama makanisa yetu yote yangeona na kuitambua kafara isiyo na kikomo ya Kristo!

Katika maono ya usiku, nilioneshwa mbele yangu harakati kuu ya matengenezo miongoni mwa watu wa Mungu. Wengi walikuwa wakimsifu Mungu. Wagonjwa waliponywa na miujiza mingine ilitendeka. Roho ya upatanisho ilionekana, kama ambavyo ilionekana kabla ya Siku kuu ya Pentekoste. Mamia na maelfu walionekana wakitembelea familia na kuwafungulia Neno la Mungu. Mioyo iliongolewa na nguvu ya Roho Mtakatifu na roho ya uongofu wa kweli ilidhihirishwa. Kila upande milango ilifunguliwa kwa ajili ya utangazaji wa ukweli. Dunia ilionekana kuangaziwa na mvuto wa mbinguni. Baraka kuu zilipokelewa na watu wa Mungu wa kweli na wanyenyekevu. Nilisikia sauti za shukrani na za sifa....

Hukumu ya Mungu imeanza duniani na kwa mvuto wa Roho Mtakatifu, lazima tutoe ujumbe wa onyo ambao Ametukabidhi. Lazima tutoe ukweli huu haraka, mstari juu ya mstari, kanuni juu ya kanuni. Hivi karibuni watu watalazimishwa kufanya maamuzi makuu na ni wajibu wetu kuona kwamba wanapewa fursa ya kuuelewa ukweli, ili waweze kufanya maamuzi yao kwa busara katika upande ulio sahihi. Bwana anawaita watu Wake kufanya kazi—kufanya kazi kwa bidii na kwa busara—wakati mlango wa rehema ukingali wazi.

Miongoni mwa washiriki wa kanisa letu kunapaswa kuwa na kazi ya nyumba kwa nyumba katika kutoa mafundisho ya Biblia na kutawanya machapisho. Tabia ya Kikristo inaweza kuundwa kwa ulinganifu na ukamilifu pale tu wakala wa kibinadamu anapoiona kuwa ni fursa kufanya kazi bila kujali katika kutangaza ukweli na kuendeleza kazi ya Mungu kwa mali. Ni lazima tupande kando ya maji yote, tukizitunza roho zetu kwa upendo wa Mungu, tukifanya kazi kungali mchana na kutumia mali ambazo Bwana ametupatia ili kufanya wajibu wowote unaofuata. Chochote kile mikono yetu ipatacho kufanya, tunapaswa kukifanya kwa uaminifu; bila kujali ni kafara ya aina gani tumeitwa kuitoa, tunapaswa kuitoa kwa uchangamfu. Tunapopanda karibu na maji yote tutagundua kwamba “Apandaye kwa ukarimu atavuna kwa ukarimu” (2 Wakorintho 9:6)....

Bwana ameweka mbele yangu kazi ambayo inapaswa kufanywa katika miji yetu. Waumini katika miji hii wanapaswa kufanya kazi kwa ajili ya Mungu kwa majirani zao. Wanapaswa kufanya kazi kimya kimya na kwa unyenyekevu, wakichukua pamoja nao popote waendako anga hewa ya mbinguni. Ikiwa wataitupilia mbali nafsi, wakiwaelekeza watu kwa Kristo daima, nguvu ya ushawishi wao itawagusa watu (**Testimonies for the Church 9:125-128**).